



Communicaziun allas medias digl cumegn da Surses (nr. 07-2022)

Surses: Igl cumegn sustigna la sanaziun da dus hotels

Igl suveran digl cumegn da Surses ò decida da sustignair la sanaziun da dus hotels cun mintgamai ena contribuziun finanziaria. Pinavant è nia concedia en credit per cumprar en auto-stgela per igls pumpiers da Surses e da surpiglier igl mantignamaint dallas ovras da migliuraziun digls anteriours cumegns da Salouf e Riom-Parsonz. Er la concessiun d'en dretg da biagier è nia approvo sainza discussiun.

Sustign da promoziun per igl hotel Danilo a Savognin ed igl Post Hotel Löwe a Mulegns

Cun clera maioritad ò la radunanza communal decida da conceder alla cjo SA, possessoura digl hotel Danilo a Savognin, ena contribuziun da promoziun à fonds perdu da max. 240'000.00 francs per sanar igl hotel. La somma d'investiziun pertutgont la sanaziun digl hotel Danilo monta a 4.8 milliuns francs.

Ena sagonda contribuziun da max. 263'000.00 francs ò igl suveran concedia an favour dalla Nova Fundaziun Origen per sanar igl Post Hotel Löwe a Mulegns. La somma d'investiziun per renovar chel hotel monta a 5.26 milliuns francs.

Las dus contribuziuns èn neidas concedidas alla basa dallas directivas digl cumegn da Surses davart la promoziun da hotels e da menaschis d'alloschamaint cun letgs administros. Cun chellas maseiras vot igl cumegn da Surses promover la construcziun da hotels novs e pussibilitar da sanar hotels existents.

Surpiglier igl mantignamaint dallas ovras da migliuraziun digls anteriours cumegns da Salouf e Riom-Parsonz

Sainza cuntervusch ò la radunanza communal decida da surpiglier las incumbensas dalla Societad da mantignamaint Salouf. Igl madem mument èn nias annullos igls statuts dalla societad. Chella societad era neida fundada igls onns 1990 per garanteir igl mantignamaint dallas ovras da migliuraziun a Salouf. Cunchegl tgi gl'è betg ple sto pussebel da cattar commembers per la suprastanza dalla societad ò chella dumando da pudeir surdar las incumbensas agl cumegn. Alla basa dalla dumonda da surpiglier la societad da mantignamaint Salouf ò la suprastanza proponia d'annullar mademamaintg la lescha davart igl mantignamaint dallas ovras da migliuraziun digl anteriour cumegn da Riom-Parsonz. Chegl per contanscher igl tractamaint egal da tot las vischnancas digl cumegn da Surses. Angal igls anteriours cumegns da Salouf e Riom-Parsonz incassavan numnadamaintg taxas per igl mantignamaint dallas ovras da migliuraziun. Tot igls oters cumegns uriunds an Surses on fatg las lavours da mantignamaint ad agen chint. Siva dalla fusiun igl 2016 ò igl cumegn da Surses da harmonisar las leschas digls anteriours cumegns.

Ulteriouras decisiuns

La radunanza communal ò approvo igl credit brut da 450'000 francs per la compra d'en auto-stgela d'ocasiun per igls pumpiers da Surses. La sieranza d'edifezis digl Grischun surpeglia ena part digls costs. La compra succeda tenor la lescha da submitsiun.

Alla dumonda per en dretg da biagier d'ena surfatscha da 3'527 m² giu d'ena parcella da cumegn ainten la zona d'industreia da Mulegns ò la radunanza communal aderia.

Ulteriouras infurmaziuns dat igl mastral Leo Thomann (mobile 079 405 96 73)